



Ilulissat kangerluata UNESCO-miittortaata angissusaata pitsaaqutai ajoqutaalu pillugit Naalackersuisut UKA2022-mut saqqummiussassamik nassuiaasioqqullugit peqquneqarnissaanut Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Inatsisartunut ilaasortamut, Aqqalu C. Jeremiassen-mut siunnersuummut, Ilulissat inuussutissarsiornikkut ineriartornissaanut piukkunnartup oqallisiginissaanut periarfissimmatigut, qujanarujussuaq.

Demokraatinut pingaartuuvoq pinngortitap inuussutissarsiornikkullu ineriartornerup pitsaanerpaamik oqimaaqatigiinnerata nassaarinnissaa. Ilulissat eqqaat kusanartorsuuvoq, toqqaannartumillu pissutaalluni takornariarpassuit nunarsuarmit tamarmit Ilulissiarusuttarnerannut. Taanna suli annertuningussaaq, mittarfissarsuaq ammarpat, taassuma kingunerissammagu, Ilulissanut aqqutip annertungaartumik pitsanngoriannissaa, taamatullu kingunerissallugu takornariat amerlanerit aammalu inuussutissarsiornikkut siuariartorneq.

Tamanna nuannaarutigissavarput, nunatta aningaasaqarneranut pitsanngorsaataassammatt, taamaattorli qulakkiissavarput, tikerartut amerlinerisa pinngortitamut ajornerusumik kinguneqannginnissaa, tamanna pitsaassanngimmat iluliarmiunut aammalu siunissami takornarianik tikerartoqartuarnissaanut.

Qularutissaanngilaq, Ilulissat kangiata UNESCO-p eriagisassatut allattorsimaffianiilernerata Ilulissat takornarianut pilerinarninngortimmagu. Aaammattaarli qularutissaanngilaq, iluliarmiut peqqissusaannut ineriartornissamullu periarfissaqarnerat aamma pingaaruteqarmat.

Soorlu siunnersuuteqartup eqqortumik uparuaraa, pitsaaquteqarlunilu ajoqutitaqarpoq UNESCO-p eriagisassatut allattorsimaffianiilerneq, illoqarfiup ineriartorneranut unikaallatsisisinnaammat.

Tamanna tunngavigalugu pitsaassaaq UNESCO-p eriagisassatut allattorsimaffianiinnerup pitsaaqutaat ajoqutaatalu misissorneqarnissaat, uagut politikkerit pitsaasumik, ersarissumik sukumiisumillu aaliangiinnissatsinni tunngavissaqarniassagatta.

Maluginiarpara, Naalackersuisut allannguutissatut siunnersuuteqarsimasut, nassuiaatip qanoq imaqarnissaanik annikillisisumik. Demokraatit siunnersuut siulleq iluarineruaat, taannalu Avatangisiinut Eqqissimatitsinermullu ataatsimiititaliami suliareqqitassanngorlugu innersuussutigaarput.